

Gabi Mouescaren zigorrak bateratzeari uko egin dio Pabeko Auzitegiak

L.F. / BAIONA

Pabeko dei auzitegiak uko egin dio Gabi Mouescak jasotako presondegi zigorraren bateratzeari legeak onartzen ohi duen bezala, «presondegitik ihes egin baitzuen eta gaiztagin elkarteko kide izaten jarraitu baitzuen». Astearte goizean etorritako euskaldunak ez zuen eskubiderik izan bere familiarekin mintzatzeko eta epaiketa bukatu bezain laster Parisera eraman zuen Poliziak. 1984ko martxoan atxilotutako euskaldunak Auzitegi Korrekzionalean jasandako 13 urteko kondena bete ondoren, Asiseko Auzitegiak jarritako beste 15 urteko presondegi zigorra bete beharko du.

Fresnesko presondegiaren 13 urteko zigorra betetzen ari den euskaldunak eskatu zion Auzitegiari 1986an jaso zituen hiru kondena batera zitzen, denak Auzitegi Korrekzionalean eman zituelakoan. Zigor handiena kontuan hartzeko ordez, hirurak gehitzea erabaki du Auzitegiak.

Bergaretxe preso ohia Baionara itzuliko da gaur

L.F. / BAIONA

Agustin Bergaretxe Unamuno, 'Pinpo', Baionara itzuliko da arrats honetan hamar urtez Euskal Herrikan kanpo geratu ondoren. Ongi etorria eskainiko diote Gureak-ek eta Errefuxiatu eta Presoen Sustengu Komiteak bertako geltokian arratseko 8.30etan eta dei egin zuten ekitaldian parte hartzeko.

Bergaretxe 1985eko urtarrilaren 30ean atxilotu zuen Poliziak Angeluko etxe batean, Juan Lorenzo Lasa Mitxelena, Jose Martin de la Fuente eta Juan Ramon de Gaunarekin batera. Arma eta zartagailuak atzeman zituen Poliziak etxean eta Baionako epaileak gaiztagin elkarteko kide izateaz eta arma edukitzeaz inkulpatu ondoren, bertako presondegiaren sartu zituen. Parisko auzitegiak bost urteko presondegi zigorra ezarri eta bost urtez Euskal Herrian bizitzea debekatu zion Bergaretxeri.

Oposizioak gobernukideen jarrera «antidemokratikoa» salatu du

Batzordeetako zuzendaritza guztiak gobernu koalizioaren esku

Gasteizko Legebiltzarrak ez du oraindik hasi ekitaldi politikoa, baina lehen polemika piztu da oposizioaren eta Jaurlaritzako alderdien artean, hauek batzorde guztien zuzendaritzak hartu dituztelako oposizioari aukerarik eman gabe.

FELIX IRIARTE / GASTEIZ

Batzordeak eta hauen Mahaia osatu ziren atzo Gasteizko Legebiltzarrean, eta saioa polemiko bihurtu zen. Aldez aurretik EAJk, PSE-EEK eta EAK hitzartuta zeukaten Mahaiko hiru karguak —lehendakaria, lehendakariordea eta idazkaria— euren artean banatzea, eta halaxe egin zuten, oposizioari alderdien kritikak aintzat hartu gabe.

Karmelo Landa Herri Batasunako bozeramaileak egin zuen lehen kritika. Aldez aurretik Jaurlaritzako alderdiek banaketa hitzartu izana salatu zuten, eta jarrera hori «antidemokratikotzat» jo zuten. «Ez dute aukerarik eman eztabaida demokratikoa egiteko. Erabat lotuta ekarri dute guztia eta horrek erakusten du nolako iritzia eta praktika duten hauek. Beraientzat Parlamentua tresna bat da populazioa goitik behera kontrolatzeko», salatu zuen Legebiltzarreko korridoreetan, HBk ez baitzuen —protesta egiteko— bozketan parte hartu.

Jaurlaritzako alderdiek batzordeetan izango duten kontrol horrek Legebiltzarreko agerraldiak eragotziko dituen susmoa du koalizio abertzaleak. Landak galdera hori egin zuen Joseba



HB kexu agertu zen gobernukideen kontrol nahiagatik.

OLALDE

Leizaola Legebiltzarreko lehendakariak baimendu zuen parte-hartze bakarrean, baina ez zuen erantzunik lortu. HBk, arrazoi ezberdinengatik bada ere, Jose Antonio Ardanza eta Ramon Jauregi agertzeko eskatua du. Lehendakariak bere koinatuaren lan kontratua argitu behar luke eta Justizia sailburuak GAL auziarekin zerikusirik izan duen.

EA Javier Madrazo
ERABAKIAREN IU-EBko boze-
AURKA ramaileak hitz

egin nahi izan zuen. Baina alferri, Leizaolak ez zion baimenik eman eta. Gero, pasiloetan, esan zuen gobernukideek Parlamentua mesprezatu egin dutela eta euren gogara erabili nahi dutela salatu zuen. Halaber, beste legegintzaldi batzuetan oposizioak batzordeetako mahaian egon direla gogoratu zuen.

Leopoldo Barreda PPko ordezkariak ildo beretik jo zuen.

«Legebiltzarra ez da Jaurlaritzaren gehigarria. Aitzitik, euskal gizartearen aniztasuna isladatu behar du», adierazi du prentsa ohar baten bidez. Eta erantsi du: «Hiruko gobernuak joko demokratikoa boterearen monopolioa dela uste du».

EAJk sei lehendakaritza eta beste hainbeste lehendakariordezta lortu ditu, PSE-EEK lau lehendakaritza, sei ordezkari eta bi idazkaritza eta EAK bi lehendakari eta hamar idazkari. Baina alderdi hau ez dator bat hiruren artean egindako banaketarekin, nahiz eta bozketan kontrako botorik ez zuen eman.

Carlos Garaikoetxeak esan zuen bere alderdia prest dagoela euren postuak oposizioari alderdiei uzteko, eta horrela justifikatu zuen bozketa: «Guk alderdi guztiak Mahaian egotea nahi genuen, baina ezin izan dugu lortu, EAJ eta PSE-EE ez zeudelako ados».

Sanz izendatzeko proposamena ez dator bat UPNko estatutuekin

IRUÑEA

UPNko batzorde eragileak Miguel Sanz lehendakariari izendatzeko egin duen proposamena ez dator bat alderdi horren estatutuekin.

UPNko estatutuek 35. artikuluan diotenaren arabera, batzorde eragileak zerrenda itxi bat —hau da, Nafarroako Parlamenturako 50 hautagaien izenekin— proposatu behar dio Erregio Batzordeari. Era berean, Erregio Batzordeak proposatutako zerrenda onartzeko edo errefusatzeko ahalmena duela dio UPNko estatutuen 25. artikulua.

Haatik, UPNko batzorde eragileak zerrendaburua besterik ez zuten aurreratu joan zen astele-

henean eginiko bilkuran, eta hori da etzi egingo den bileran Erregio Kontseiluari proposatuko dion izen bakarra, Miguel Sanzen alegia; ez zerrenda osoa alderdiaren estatutuek agintzen duten moduan.

Oraindik ikusteko dago Juan Cruz Alliren jarraitzaileek argudio honi helduko ote dioten Miguel Sanzen izendapena garaizteko edo, aitzitik, alderdiaren estatutuak alde batera utzita egingo ote den Korellakoaren hautaketa.

Juan Cruz Alli lehendakaria, bestalde, alderdiko Diziplina Batzordearen aurrean agertuko da gaur arratsaldean, duela egun batzuk egin zituen adierazpenei buruzko azalpenak emateko bertan.

Nafarroan atxilotuetako bat libre utzi dute

IRUÑEA

Astelehen gauean Iruñerrian atxilotuetako bat, Jaime Encinas, libre utzi zuten atzo eguerdian Madrilgo Entzutegi Nazionaletik pasatu ondoren. Encinasek uko egin zion epailearen aurrean deklaratzeari.

Nafarroan atxilotutako beste biak (Ana Buitron 27 urtekoa eta Txema Jurado 24 urtekoa) gaur goizean eramango dituzte epailearengana. Zenbait iturrik talde armatuari laguntza eman izana leporatu diete. Beste batzuek, berriz, katean istiluak eragiteaz akusatuta daudela jakinarazi dute.

Jarrai gazte erakundeak aipatu atxilotetako Poliziaren eta komunikabide jakin batzuen «muntaiak» izan direla adierazi du prentsa ohar baten bidez. Jarrairen arabera, Iruñeko gazteen aurkako salaketak «funsgabeak» dira eta atxilotetako «gaztediaren kontrako erasoak». Gazte erakundeak atxilotutakoak askatzeko eskatu du eta alde berean dei egin die ikasleei gaur eguerdiko hamabietan Gaztelu plazan elkar daitezen.

Txantreako Auzotegi elkartek, bestalde, Goardia Zibilaren jokaera gaitzetsi du. Goardia zibilek hiru orduz miatu zuten aipatu elkartea herenegun goizean eta bertatik argazkiak, agiriak eta hainbat bote huts hartu zituzten. Beren helburua Txantreako sektore jakin bat «kriminalizatzea» zela salatu dute Auzotegikoek.

AYUNTAMIENTO DE PAMPLONA

Kultur Programazioa: Hitzaldia

Gaur osteguna, arratseko 7.30etan
Hizkuntz Eskolako Compañía aretoan

Mahai ingurua: "Euskal idazle berriak Nafarroan"

Partaideak: JUANTXO URDIROZ
XABIER DIEZ ESARTE
JOKIN BALENTZIA
JOSETXO AZKONA AZKONA
FELIPE RIUS SALETA
XABIER MANGADO

Moderatzailea: ENRIKE DIEZ DE ULTZURRUN

NAFAR ATENEOAREKIN LANEAN